

20 MAY 1999

PERTUKARAN BERI TANGGUNGJAWAB BERBEZA, KATA AZMI

KUALA LUMPUR, 20 Mei (Bernama) -- Timbalan Menteri Perumahan dan Kerajaan Tempatan Datuk Azmi Khalid berkata pertukarannya ke Kementerian Dalam Negeri merupakan pertukaran biasa dengan tanggungjawab yang berbeza.

"Ia satu tanggungjawab baru daripada satu kementerian ke kementerian yang lain. Bagi saya ia satu bidang yang baru," katanya kepada pemberita di lobi bangunan Parlimen di sini.

Dalam rombakan kecil kabinet yang diumumkan oleh Perdana Menteri Datuk Seri Dr Mahathir Mohamad pagi ini, Azmi akan menggantikan Datuk Abdul Kadir Sheikh Fadzir yang dinaikkan pangkat sebagai Menteri Kebudayaan, Kesenian dan Pelancongan, menggantikan Datuk Seri Sabbaruddin Chik.

Azmi mengucapkan terima kasih kepada Perdana Menteri dan berikrar akan berusaha melaksanakan peranannya sebaik yang boleh setelah mendalami tugas dan tanggungjawab barunya itu secepat mungkin.

Mengenai rombakan Kabinet itu beliau berkata: "Ia adalah keputusan pucuk pimpinan dan saya percaya pucuk telah membuat satu pertimbangan yang sehalus-halusnya."

Azmi, 58, yang berasal dari Perlis, dilantik sebagai Timbalan Menteri Perumahan dan Kerajaan Tempatan pada Mei 1997 setelah memegang jawatan Setiausaha Parlimen di Jabatan Perdana Menteri mulai Mei 1995.

-- BERNAMA

NM NMO